

## DAVIS, DAVID ('Dafis Castellhywel'; 1745-1827), gweinidog Ariaidd, bardd, ac ysgolfeistr

**Enw:** David Davis  
**Ffugenw:** Dafis Castellhywel  
**Dyddiad geni:** 1745  
**Dyddiad marw:** 1827  
**Priod:** Anne Davies (née Evans)  
**Plentyn:** David Davies  
**Plentyn:** Timothy Davis  
**Rhiant:** Timothy Jacob  
**Rhyw:** Gwryw  
**Galwedigaeth:** gweinidog Ariaidd, bardd, ac ysgolfeistr  
**Maes gweithgaredd:** Crefydd; Addysg; Barddoniaeth  
**Awdur:** Thomas Oswald Williams

Ganwyd yn Goitreisaf, Betws Bledrws, Sir Aberteifi, 14 Chwefror 1745, mab Timothy Jacob, ac fe'i derbyniwyd yn aelod yn y Cilgwyn 'yn y 18fed flwydd o'i oedran yn y flwyddyn 1763.' Fe'i haddysgwyd dan David Jones (Llanybyther), T. Lloyd (Llangeler), [Joshua Thomas](#), yn Ysgol y Coleg, a Choleg Caerfyrddin (1763-7), a bu'n athro cynorthwyol yn Ysgol y Coleg am ysbaid. Tua diwedd 1768 daeth yn gydweinidog â [David Lloyd](#) yn Llwynrhydowen, Ciliau Aeron, Alltyplaca, Penrhiw, a Mydroilyn, ac yn ddiweddarach yn weinidog hefyd ym Mwlchfyadfa, gan fyw ym Mhlasbach, Ciliau Aeron, a phriodi Anne Evans y Foelallt, yres Sgwier Davies, Plasbach. Tua 1782 symudodd i fyw i Gastellhywel, Dyffryn Cletwr, ac fe'i hadwaenid o hyn allan fel 'Dafis Castellhywel.' Bu'n cadw ysgol am dros 30 mlynedd, ac iddo glod fel athro drwy Gymru gyfan; ordeinid offeiriaid o'i ysgol am flynyddoedd. Ceir enwau rhyw 111 o'i hen ddisgyblion fel tanysgrifwyr i *Telyn Dewi*. Cyfathrachai â'r [Dr. Richard Price](#), [Edward Williams](#) ('Iolo Morganwg'), [Thomas Roberts](#), Llwyn'rhudol, '[Glanygors](#),' [Thomas Evans](#) ('Thomas Glyn Cothi'); a throes lu o w r ei ardal yn bleidwyr y Chwyldro Ffrengig. Yn 1801-2 bu anghydfod a rhwyg yn ei eglwysi, a chododd y blaid flaengar gapeli Undodaidd Pantydefaid a Capel-y-groes. Ymddiswyddodd 16 Ionawr 1820 wedi gweinidogaethu 52 o flynyddoedd. Cyhoeddodd *Bywyd Duw yn Enaid Dyn*, cyfieithiad o lyfr Henry Scougal, *The Life of God in the Soul of Man*, 1779, cyfieithiad o fyfyrddod ar einioes ac angau o waith Thomas Gray, 1789, *Cri Carcharor dan farn Marwolaeth*, 1792, ac yn 1824 cyhoeddwyd casgliad o'i weithiau barddonol dan yr enw *Telyn Dewi*. Bu farw 3 Gorffennaf 1827 a chladdwyd ym mynwent eglwys Llanwenog.

Mab hynaf 'Dafis Castellhywel' oedd DAVID DAVIS, Castellnedd (1778 - 1846), gweinidog Undodaidd ac ysgolfeistr; wedi ei addysgu gartref ac yng Ngholeg Caerfyrddin (1796-1800), ymsefydlodd yng Nghastell Nedd fel gweinidog cyntaf y gynulleidfa Undodaidd, gan agor ysgol yn y dref. Daeth dan ddylanwad Dr. Priestley, a sefydlodd Gymdeithas Undodaidd Deheudir Cymru yn 1802 er rhoi ohono y clod i [Edward Williams](#) ('Iolo Morganwg') (*Monthly Repository*, 1811, 189). Wedi rhyw 24 blynedd fel gweinidog ac ysgolfeistr galluog a dysgedig collodd ei iechyd, a bu anhwylydeb y meddwl arno weddill ei

ddyddiau. Cyhoeddodd fân draethodynnau, a golygodd *Telyn Dewi*, 1824. Fe'i siomwyd pan apwyntiwyd y [Parch. D. L. Jones](#) (Glynadda) yn athro yng Ngholeg Caerfyrddin, a bu yn ei fryd ef a [John James](#), Gellionnen, agor coleg yng Nghastell Nedd, ond ni ddaeth dim o'r peth. Bu farw 4 Rhagfyr 1846, a chladdwyd ym mynwent capel Heol Awst, Caerfyrddin.

Ail fab ' Dafis Castellhywel ' oedd Timothy Davis (1779 - 1860), gweinidog Undodaidd ac ysgolfeistr; wedi'i addysgu gartref, yn Ysgol y Coleg, Caerfyrddin, o dan [David Peter](#), o 3 Ionawr 1798 hyd ei fynd i'r coleg yng Nghaerfyrddin (1798-1802), tua 1801 daeth yn gydweinidog â'i dad er ei fod ar yr un pryd yn gofalu am Ysgol y Coleg o dan [Peter](#). - 'Even at Carmarthen my last two years were spent in attending principally to the Grammar School.' Bu'n weinidog yn Llwynrhydowen o 1801/2 hyd 1810, ac yn ei ddyfod i'r Llwyn y ceir hwyrach asgwrn y gynnen rhwng ' Dafis Castellhywel ' a'r [Dr. Charles Lloyd](#). Bu yn weinidog Coventry (1810-9) ac Evesham (1819 hyd 18 Gorffennaf 1853). Cyfieithodd (ran o) Coke, *Scripture Commentary*, a chyhoeddodd ddwy bregeth Gymraeg (1832 ac 1848). Bu farw 28 Tachwedd 1860.

## Awdur

Y Parchedig Thomas Oswald Williams, (1888 - 1965)

## Ffynonellau

Cofiant gan 'Tau Gimel,' 1828

*Lloyd Letters (1754–96)* (1908) (liv-lxi)

Archifau LIGC: [NLW MS 5490C](#)

*Yr Ymfynnydd Coffa*, Hydref 1927

*Oxford Dictionary of National Biography*

*Hanes Plwyf Llandyssul* (1896), 102-8

## Darllen Pellach

Erthygl Wicipedia: [Dafis Castellhywel](#)

## Dolenni Ychwanegol

Archifau LIGC: [Timothy Davis \(of Coventry and Evesham\) Manuscripts](#)

VIAF: [286252437](#)

Wikidata: [Q5232862](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

